

Na osnovu člana 205. stav (4) Zakona o bankama ("Službene novine FBiH" broj: 27/17), člana 5. stav (1) tačka h) i člana 19. stav (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj 75/17) i člana 12. stav (1) tačka d) Statuta Agencije za bankarstvo Federacije BiH ("Službene novine Federacije BiH", broj 03/18), Upravni odbor Agencije za bankarstvo Federacije Bosne i Hercegovine, na sjednici održanoj dana _____ godine do n o s i

O D L U K U
O MINIMALNIM ZAHTJEVIMA ZA KAPITALOM I
PRIHVATLJIVIM OBAVEZAMA BANKE

Član 1.
Opšte odredbe

Ovom odlukom propisuju se bliži uslovi pod kojima se prihvatljive obaveze uključuju u izračunavanje minimalnog zahtjeva za kapitalom i prihvatljivim obavezama, kriteriji na osnovu kojih se utvrđuje taj zahtjev i rok u kojem su banke dužne da ispune minimalne zahtjeve za kapitalom i prihvatljivim obavezama.

Član 2.
Uslovi za uključivanje prihvatljivih obaveza u izračunavanje minimalnog zahtjeva za kapitalom i prihvatljivim obavezama

- (1) Prihvatljive obaveze banke uključuju se u izračunavanje minimalnog zahtjeva za kapitalom i prihvatljivim obavezama ako ispunjavaju sljedeće uslove (u daljem tekstu: kvalifikovane prihvatljive obaveze):
 - a) instrument na osnovu koga je nastala obaveza banke izdat je i u potpunosti uplaćen,
 - b) povjerilac po osnovu obaveza nije sama banka, niti je banka za nju dala garanciju, jamstvo ili drugo sredstvo obezbjeđenja;
 - c) banka nije neposredno ni posredno finansirala ulaganje u instrument, odnosno obavezu;
 - d) preostali rok dospijeća obaveze je najmanje godinu dana;
 - e) obaveza nije nastala po osnovu finansijskih derivata;
 - f) obaveza nije nastala po osnovu osiguranog depozita,
 - g) obaveza nije nastala po osnovu depozita čija je namjena obezbjeđenje potraživanja banke ili je obaveza nastala po osnovu takvog depozita, a iznos te obaveze je veći od iznosa potraživanja – za razliku između iznosa obaveze i iznosa potraživanja.
- (2) Ako je na osnovu obaveze iz stava (1) ovog člana povjeriocu dato pravo da zahtijeva prijeveremenu otplatu, rokom dospijeća iz tačke d) tog stava smatra se prvi datum kada povjerilac može da zahtijeva prijeveremenu otplatu.
- (3) U izračunavanje minimalnog zahtjeva za kapital i prihvatljive obaveze ne mogu se uključiti prihvatljive obaveze koje su nastale na osnovu ugovornih odnosa na koje se primjenjuje strano

pravo, ako se, prema tom pravu, rješenje Agencije za bankarstvo Federacije Bosne i Hercegovine (u daljem tekstu: Agencija) kojim se vrši konverzija u kapital ili otpis (smanjenje) glavnice obaveza ili dužničkih instrumenata ne može izvršiti.

- (4) Agencija može zahtijevati od banke da dostavi odgovarajući dokaz o tome da se rješenje Agencije iz stava (3) ovog člana može izvršiti prema mjerodavnom pravu.

Član 3.

Kriteriji za utvrđivanje minimalnog zahtjeva za kapitalom i prihvatljivim obavezama

- (1) Radi primjene kriterija iz člana 205. stav (2) tačka a) Zakona o bankama, Agencija utvrđuje mogućnost ostvarivanja ciljeva restrukturiranja primjenom raspoloživih instrumenata restrukturiranja, a naročito instrumenta unutrašnjeg restrukturiranja.
- (2) Radi primjene kriterija iz člana 205. stav (2) tačka b) Zakona o bankama, Agencija utvrđuje iznos prihvatljivih obaveza koje banka mora da obezbjedi za pokriće gubitka u slučaju primjene instrumenata unutrašnjeg restrukturiranja, te iznos prihvatljivih obaveza potreban da bi banka nakon pokrića gubitka ponovo uspostavila stopu adekvatnosti regulatornog kapitala na nivou kojim bi se omogućilo njeno dalje nesmetano poslovanje i održavanje dovoljnog povjerenja u banku na finansijskom tržištu (u daljem tekstu: iznos dokapitalizacije).
- (3) Pod iznosom dokapitalizacije podrazumijeva se iznos koji je potreban za primjenu mjera i instrumenata restrukturiranja predviđenih planom restrukturiranja, a koji je najmanje jednak iznosu potrebnom za ispunjavanje propisane minimalne stope adekvatnosti regulatornog kapitala banke, u skladu sa članom 27. stav (2) Zakona o bankama, odnosno stope adekvatnosti regulatornog kapitala koji je Agencija odredila banci u skladu s članom 27. stav (4) Zakona o bankama.
- (4) Ako smatra da je to potrebno radi postizanja i održavanja povjerenja u banku na finansijskom tržištu, Agencija može zahtijevati da iznos dokapitalizacije iz stava (3) ovog člana bude na nivou koji je potreban i za ispunjenje zahtjeva za kombinovanim zaštitnim slojem kapitala koji je primjenjiv na tu banku, u skladu sa Odlukom o izračunavanju kapitala banaka.
- (5) Ukoliko smatra da je potrebno, Agencija može prilikom izrade plana restrukturiranja odrediti nižu ili višu stopu adekvatnosti kapitala od stope utvrđene u skladu sa članom 27. stav 4. Zakona o bankama ili stavom 4. ovog člana.
- (6) Prilikom primjene kriterija iz člana 205. stav (2) tačka c) Zakona o bankama, Agencija procjenjuje koje bi prihvatljive obaveze banke vjerovatno bile izuzete od primjene instrumenta unutrašnjeg restrukturiranja ili prenesene primjenom drugog instrumenta restrukturiranja u skladu sa planom restrukturiranja.
- (7) Nakon što identifikuje obaveze iz stava (6) ovog člana, Agencija vodi računa o tome da minimalni zahtjev za kapitalom i prihvatljivim obavezama bude utvrđen u iznosu koji obezbjeđuje

odgovarajuće pokriće gubitaka i dokapitalizaciju banke bez otpisa, odnosno konverzije tih obaveza, na način kojim se ne narušavaju načela iz člana 181. Zakona o bankama.

- (8) Prilikom primjene kriterija iz člana 205. stav (2) tačka d) Zakona o bankama, Agencija procjenjuje da li kapitalni zahtjevi koji važe za banku, ostale mjere u postupku kontrole i mjere za rješavanje ili otklanjanje prepreka za restrukturiranje na odgovarajući način odražavaju veličinu, poslovni model, model finansiranja i rizični profil banke, te da li postoji potreba da se utvrđivanjem većeg ili manjeg iznosa minimalnog zahtjeva za kapitalom i prihvatljivim obavezama ispravi eventualna nesrazmjera.
- (9) Prilikom izračunavanja minimalnih zahtjeva za kapitalom i prihvatljivim obavezama banke koja je članica bankarske grupe ili grupe društava, Agencija uzima u obzir dostupnost izvora kapitala iz drugih članica bankarske grupe koji bi se mogli iskoristiti kao podrška banci u restrukturiranju.
- (10) Prilikom primjene kriterija iz člana 205. stav (2) tačka e) Zakona o bankama, Agencija vodi računa o tome da minimalni zahtjev za kapitalom i prihvatljivim obavezama bude utvrđen u iznosu koji obezbjeđuje poštovanje ograničenja iz člana 214. Zakona o bankama.
- (11) Prilikom primjene kriterija iz člana 205. stav (2) tačka f) Zakona o bankama, Agencija utvrđuje da li bi prestanak poslovanja banke predstavljao rizik po stabilnost finansijskog sistema, ako nije riječ o banci koja je utvrđena kao sistemski značajna.

Član 4.

Utvrđivanje minimalnog zahtjeva za kapitalom i prihvatljivim obavezama

- (1) Agencija primjenom kriterija iz člana 205. stav (2) Zakona i člana 3. ove Odluke utvrđuje minimalni zahtjev za kapitalom i prihvatljivim obavezama, koji omogućuje otpis i konverziju kapitala i prihvatljivih obaveza uključenih u obračun ovog zahtjeva u iznosu koji je najmanje jednak zbiru iznosa pokrića gubitaka i iznosa dokapitalizacije.
- (2) Minimalni zahtjev iz stava (1) ovog člana izračunava se kao procentualno izražen odnos zbira regulatornog kapitala i prihvatljivih obaveza prema zbiru regulatornog kapitala i ukupnih obaveza banke.
- (3) Pri utvrđivanju minimalnog zahtjeva iz člana 1. ove Odluke, Agencija može odrediti da se taj zahtjev ispuni dijelom i instrumentima za koje je banka ugovorila da se, u slučaju primjene instrumenta unutrašnjeg restrukturiranja otpisuju ili konvertuju u potrebnoj mjeri prije otpisa ili konverzije drugih prihvatljivih obaveza, kao i da se, u slučaju likvidacije ili stečaja, obaveze po tim instrumentima isplaćuju nakon izmirenja ostalih prihvatljivih obaveza, ako procijeni da bi se otpisom ili konverzijom ovih instrumenata efikasnije ostvarili ciljevi restrukturiranja, odnosno umanjili troškovi restrukturiranja.
- (4) Obaveze iz finansijskih derivata uključuju se u ukupne obaveze iz stava (2) ovog člana tako što se u potpunosti priznaje ugovoreno pravo druge ugovorne strane na netiranje, te se obaveze iz finansijskih derivata uzimaju u neto iznosu.

- (5) Subordinisane i druge obaveze koje su kao instrumenti kapitala već uključene u obračun osnovnog ili dopunskog kapitala banke u skladu sa Odlukom o izračunavanju kapitala banaka, isključuju se iz kvalifikovanih prihvatljivih i ukupnih obaveza banke u iznosu koji je uključen u obračun kapitala.
- (6) Agencija utvrđuje za svaku banku poseban minimalni zahtjev za kapitalom i prihvatljivim obavezama pri izradi plana restrukturiranja banke.
- (7) Ako je potrebno da banka preduzme određene aktivnosti kako bi se uskladila s minimalnim zahtjevom iz stava (6) ovog člana, Agencija određuje i rok u kojem je banka dužna da se uskladi sa ovim zahtjevom.
- (8) Ako se banka nakon isteka roka iz stava (7) ovog člana ne uskladi sa minimalnim zahtjevom za kapitalom i prihvatljivim obavezama utvrđenim u stavu (6) ovog člana, Agencija preuzima mjere iz člana 185. Zakona.

Član 5.

Prelazni period

- (1) Agencija može, nakon što u skladu sa članom 205. Zakona i ovom Odlukom prvi put utvrdi banci minimalni zahtjev za kapitalom i prihvatljivim obavezama, odrediti prelazni period, u toku kojeg je banka dužna da se uskladi sa minimalnim zahtjevom za kapitalom i prihvatljivim obavezama. Prelazni period ne može biti duži od 4 godine. U toku prelaznog perioda Agencija će banci odrediti planirane nivoe minimalnog zahtjeva za kapitalom i prihvatljivim obavezama na godišnjem nivou.
- (2) Po isteku prelaznog perioda minimalni zahtjevi za kapitalom i prihvatljivim obavezama banke moraju biti jednaki minimalnim zahtjevima za kapitalom i prihvatljivim obavezama banke utvrđenim u skladu sa članom 4. stav 6. ove Odluke.
- (3) Primjena stava 1. i 2. ovog člana ne sprečava Agenciju da revidira trajanje prelaznog perioda ili iznos minimalnog zahtjeva za kapitalom i prihvatljivim obavezama banke.

Član 6.

Prelazne i završne odredbe

Ova Odluka stupa na snagu osmog dana po objavljivanju u Službenim novinama Federacije Bosne i Hercegovine.

Broj U.O.- /18

Predsjednica

_____2018. godine

Upravnog odbora

Sarajevo

